

Morning Dogri (NSD) Bulletin 01-03-2025

आकाशवाणी

- प्रधानमंत्री नरेंद्र मोदी होर कृषि ते ग्रामीण सम्पन्नता पर बजट मगरा कराए जारदे इक वेबीनार गी वर्चुअल ढंग्गै कन्नै संबोधित करडन।
- प्रधानमंत्री होरें सूफी परम्परा दी सराहना कीती ऐ जिन्नै भारत च अपनी अनूठी पंछान गी कायम रक्खेआ ऐ।
- केंद्र नै पासपोर्ट जारी करने सरबंधी नियमं च संशोधन करदे होई पैहली अक्तूबर 2023 मगरा जन्मे दे प्रार्थिएं आसेआ जारी जन्म तिथि प्रमाण पत्र गी लाजमी करी दित्ता ऐ।
- अमरीका दे राष्ट्रपति डोनाल्ड ट्रम्प होरें फौरन रूस ते यूक्रेन बश्कार संघर्ष विराम लेई आखेआ ऐ। उनें यूक्रेन दे राष्ट्रपति होरें गी शांति कायम करने जां अमरीका दा समर्थन मुहाने चा इक्क गी चुनने दी चेतावनी बी दित्ती ऐ।
- टेनिस च भारत दे यूकी भांभरी ते उन्दे आस्ट्रेलियाई भ्याल खडारी Alexie Popyrin होर दुबई प्रतियोगिता दे मर्दे दे डबल्स फाइनल च पुज्जी गेन।
- आई.सी.सी चैंपियन ट्रॉफी क्रिकेट च आस्ट्रेलिया नै सेमीफाइनल च अपनी थाहर बनाई लैती ऐ।



PM-Webinar

प्रधानमंत्री नरेंद्र मोदी होर अज्ज नमीं दिल्ली च कृषि ते ग्रामीण सम्पन्नता पर इक वेबीनार गी वर्चुअल ढंग्गै कन्नै संबोधित करडन। बजट दे बाद होआ रदे इक दिनै दे इस वेबीनार दा मकसद बजट 2025 दी घोषणाएं गी प्रभावशाली ढंग्गै कन्नै लागू करने बक्खी सब्बनें

हितधारकें दा ध्यान दोआना ऐ। एहदे कन्नै कृषि विकास ते ग्रामीण सम्पन्नता पर ध्यान केंद्रित होग ते बजट दे लक्ष्यें गी हासिल करने च रलिए जत्न करना यकीनी बनोग। सब्बै केंद्री मंत्री एहदे च शामिल होआ रदे ना। कृषि ते करसान कल्याण मंत्री शिवराज सिंह चौहान होर दपैहरी मगरा अपने विचार वेबीनार च पेश करंगन।

<><><><><><>

PM Subi

प्रधानमंत्री नरेंद्र मोदी होरें सूफी परम्परा आसेआ भारत च अपनी अनूठी पंछान बनाने लेई सराहना कीती ऐ। उनें सूफी परम्परा गी भरत दी सांझी विरासत दा हिस्सा दस्सेआ ऐ ते एहदे संते दे बहुवादी संदेशें दी प्रशंसा कीती। प्रधानमंत्री होर कल संझा नमीं दिल्ली दी सुंदर नर्सरी च जहाने खुसरो संगीत समारोह च बोला रदे हे। एहू समारोह प्रसिद्ध सूफी कवि अमीर खुसरो हुंदी सम्हालै च कराया जंदा ऐ।

<><><><><><>

PM Conclave

प्रधानमंत्री होर अज्ज भारत मंडपम नमीं दिल्ली च NXT सम्मेलन च हिस्सा लैडन। इस समारोह च चैनल News X World दा शुभारम्भ बी कीता जाग। प्रधानमंत्री होरें अपनी सोशल मीडिया पोस्ट च ITV Network and foundation गी इस सम्मेलन च बक्ख-बक्ख खेत्तरे दे लोके गी कट्टा करने लेई बधाई दिती।

<><><><><><>

VP-Mumbai Visit

उपराश्ट्रपति जगदीप धनखड अज्ज मुम्बई दा इक दिनै दा दौरा करंगन। अपने दौरे च उपराश्ट्रपति होर के.पी.बी हिंदुजा कालेज ऑफ कामर्स दे 75में स्थापना दिवस समारोह च मुख्ब अतिथि दे तौर पर शामिल होडन।

<><><><><><>

Govt. Passport Rules

केन्द्र सरकारै, पासपोर्ट सरबन्धी नियमें च संशोधन कीता ऐ। इ'नें नमें नियमें मूजब, पैहली अक्तूबर 2023 जां ओहदे परैन्त पैदा होए दे पासपोर्ट आवेदकें लेई जन्म प्रमाण पत्र गै जरम दी तरीक दा इक्क मात्तर प्रमाण होग। पासपोर्ट नियम-1980 च संशोधन गी जारी करने लेई इक आधिकारिक अधिसूचना जारी कीती गई ऐ।

नमें नियमें मूजब जन्म ते मृत्यु पंजीकरण अधिकारी, नगर निगम यां जन्म ते मृत्यु पंजीकरण कानून, 1969 दे तैहत कुसै होर अधिकारी आसेआ जारी जन्म प्रमाण पत्र, 1 अक्टूबर 2023 गी ओहदे परैन्त पैदा होए दे लोकें लेई जन्म दी तरीक दे प्रमाण दे तौर उप्पर स्वीकार कीते जाडन। होर दुए आवेदक जन्म दी तरीक दे प्रमाण पत्र दे रूप च ड्राइविंग लसैंस, पैन कार्ड, मतदाता पन्ध्यान पत्तर यां स्कूल छोडने दे प्रमाण पत्र ज्नेह होर दुए वैकल्पिक दस्तावेज जमा करोआई सकदे न।

<><><><><><>

Trump Zelenski

वाशिंगटन च जंदे रोज अमरीका दे राश्ट्रपति डोनाल्ड ट्रम्प ते यूक्रेन दे राश्ट्रपति वोलोदिमीर ज़ेलेन्स्की हुंदे बश्कार त्रिक्खी बैहस दे मगरा बेशकीमती खनिजें दे बारै च समझौते उप्पर दस्तख्त करने लेई अमरीका ते यूक्रेन बश्कार गल्लबात नाकाम होई गई। यूक्रेन दे राश्ट्रपति

जेलेँस्की होरें आखेआ जे उ'नें राष्ट्रपति ट्रम्प होरेंगी आखेआ जे जंग दे हल लेई गल्लबात च रूसी राष्ट्रपति व्लादिमीर पुतिन हुंदे कन्नै कोई समझौता नेई होना लोडचदा ऐ। एह बैठक यूक्रेन दी खनिज संपदा गी सांझा करने लेई अमरीका-यूक्रेन समझौते थमां पैहले होई। बैठक दे बाद इक सोशल मीडिया पोस्ट च राष्ट्रपति ट्रम्प होरें आखेआ जे राष्ट्रपति जेलेँस्की शांति लेई तैयार होने पर व्हाइट हाउस वापस आई सकदे ना।

बैठक दे बाद दौनें नेताएं बश्कार इक तय सांझे समाचार सम्मेलन गी बी रद्द करना पेई गेआ। मगरा इक सोशल मीडिया पोस्ट च राष्ट्रपति जेलेँस्की होरें यूक्रेन गी समर्थन देने लेई अमरीका, कांग्रेस ते अमरीकी लोकें दा धन्नवाद कीता। उ'नें आखेआ जे यूक्रेन गी न्याऽपूर्ण ते स्थायी शांति दी लोड ऐ ते ओह एहदे लेई कम्म करै करदे ना।



Trump Zelenski Add

अमरीका दे राष्ट्रपति डोनाल्ड ट्रंप होरें आखेआ ऐ जे यूक्रेन दे राष्ट्रपति वोलोदिमीर जेलेँस्कील ऐसे व्यक्ति न जेहडे शांति नेई चांहदे जदके रूस दे राष्ट्रपति व्लादिमीर पुतिन जंग गी खत्म करना चांहदे ना। कल व्हाइट हाउस च संवाददाताएं कन्नै गल्लबात च ट्रंप होरें आखेआ जे जेलेँस्की होर म्हेशां पुतिन हुंदे बारै च नकारात्मक गै बोलदे रौंहदे ना। तोआई फ्रांस दे राष्ट्रपति इमैनुअल मैक्रों होरें आखेआ ऐ जे यूक्रेन युद्ध च जेकर कोई हमलावर ऐ तां ओह रूस ऐ। कल संवाददाताएं कन्नै गल्लबात च उ'नें आखेआ जे रूस हमलावर ऐ ते यूक्रेन दी जनता हमले थमां पीडित ऐ। मैक्रों होरें आखेआ जे फ्रांस, यूक्रेन दी मदद करने ते रूस पर बंदिश लाने लेई वचनबद्ध ऐ। इसै चाल्ली स्पेन दे प्रधानमंत्री पैद्रो सांचेज होरें आखेआ ऐ जे उ'दा मुख यूक्रेन दे समर्थन च ऐ। यूक्रेन दे कट्टर समर्थक पोलैंड नै बी अमरीका दे कन्नै विवाद दे बाद यूक्रेन गी भरोसा दोआया ऐ।

सोशल मीडिया दी इक पोस्ट च पोलैंड दे प्रधानमंत्री डोनाल्ड टस्कस होरें आखेआ ऐ जे यूक्रेन इक्कला नेई ऐ। इक बक्खी जित्थे यूरोपी मुल्खें दे नेता यूक्रेन दे राष्ट्रपति वोलोदिमीर ज़ेलेंस्की हुंदे समर्थन च इक-जुट होई गे न, उत्थे गै अमरीका दे राष्ट्रपति डोनाल्ड ट्रम्प ते उपराष्ट्रपति जेडी वेंस हुंदे आसेआ कल व्हाइट हाउस च श्री ज़ेलेंस्की होरें'गी फटकार लाने दे बाद रूस दी सरकारी मीडिया ते रूस दे राष्ट्रपति व्लादिमीर पुतिन हुंदे सैह्योगियें खुशी जाह्न कीती ऐ। रूस दी सुरक्षा परिषद दे उप-प्रमुख दिमित्री मेदवेदेव होरें टेलीग्राम पर लिक्खेआ ऐ जे श्री ट्रम्प होरें यूक्रेन दा सख्त बरोध कीता। उ'नें इब्बी आखेआ जे राष्ट्रपति डोनाल्ड ट्रम्प यूक्रेन दे कारण त्रीये विश्व युद्ध होने दी शेंका गी लेइयै स्हेई न। रूस दे सैह्योगी हंगरी दे प्रधानमंत्री विक्टर ओर्बन होरें राष्ट्रपति डोनाल्ड ट्रम्प हुंदी सराहना कीती ते उ'दा धन्नवाद कीता।

<><><><><><>

Telangana Tunnel

तेलंगाना च श्री शैलम लेफ्ट बैंक कैनाल सुरंग च फंसे दे लोकें गी बचाने लेई युद्धस्तर पर बचाऽ कम्म जारी ऐ। नागरकुर्नूल दे जिला अधिकारी, बदावथ संतोष होरें मीडिया गी दस्सेआ जे सुरंग सरबन्धी आपदाएं च म्हारथ रक्खने आहली 11 बड्डी एजेंसियां बचाऽ कम्मै च लग्गी दिआं न।

उ'नें दस्सेया जे बचाऽ अभियान बरोबर जारी ऐ ते इस मामले कन्नै जुडी दी सब्भनें ताज़ा जानकारियें कन्नै तुरत मीडिया गी अवगत करोआया जाह्ग। पिच्छले शनिवारें सुरंग दी छत्त दा इक हिस्सा ढहेई पौने करी 8 लोक एह्दे अंदर फसी गे हे।

<><><><><><>

Tennis

टेनिस च भारत दे यूकी भांबरी ते उं'दे ऑस्ट्रेलियाई जोडीदार एलेक्सी पोपिरीन दुबई चैंपियनशिप दे मर्दे दे डबल्स दे फाइनल च पुज्जी गे ना। भांबरी ते पोपिरीन हुं'दी जोडी नै कल सेमीफाइनल च संयुक्त अरब अमीरात दे जैमी मरे ते ऑस्ट्रेलिया दे जॉन पियर्स दी जोडी गी 6-2, 4-6, 10-7 कन्नै ह्याया। इस जित्त दे कन्नै भांबरी अपने करियर दी एटीपी सर्वश्रेष्ठ डबल्स रैंकिंग च 41में नम्बरै पर पुज्जी गे'न। भांबरी ते पोपिरीन हुं'दी जोडी दा मुकाबला अज्ज सं'झां संयुक्त अरब अमीरात दे हैनरी पैटन ते फिनलैंड दे हैरी होलिया-वारा कन्नै होगा। एहू मैच अज्ज भारती समें मताबक सं'झां 6 बजे थमां खेड्डेआ जाहगा।



Cricket

आईसीसी चैंपियन्स ट्रॉफी क्रिकेट टूर्नामेंट च कल ल्हौर च ऑस्ट्रेलिया ते अफगानिस्तान बशकार मैच बरखा करी रहू होई गेआ ते दौनें टीमें गी इक-इक अंक मिलेआ।

एहूदे कन्नै गै ऑस्ट्रेलिया नै ग्रुप बी थमां सेमीफाइनल च अपनी थाह पक्की करी लैती ऐ। अफगानिस्तान नै पैहले बल्लेबाजी करदे होई तय 50एं ओवरें च 273 द्रौड़ां बनाइयां। अफगानिस्तान दी तरफा सदिकुल्लाह अटल नै सब्भनें शा मते 85 जदके अजमतुल्लाह ओमरजई नै 67 द्रौड़ां बनाइयां। 274 दे लक्ष्य दे जवाब च ऑस्ट्रेलियाई टीम 13में ओवर च इक विकेट दे नुकसान पर 109 द्रौड़ा बनाई चुकी दी ही जिसलै बरखा करी मैच रोकना ते मगरा रहू करना पेई गेआ। ऑस्ट्रेलिया फिलहाल ग्रुप-बी च 4 अंके दे कन्नै सब्भनें शा उप्पर ऐ, जदके अफगानिस्तान त्रै अंके दे कन्नै त्रीये नम्बरै पर ऐ। दक्खन अफ्रीका बेहतर रनरेट करी त्रै अंके दे कन्नै दुई थाहै पर ऐ। इंग्लैंड इस प्रतियोगिता थमां पैहले गै बाहर होई चुके दा

ऐ। ग्रुप-बी च अज्ज संझां कराची च दक्खन अफ्रीका दा सामना इंग्लैंड कन्नै होगा।
सेमीफाइनल च थाह पक्की करने लेई दक्खन अफ्रीका लेई इस मैच च जित्तना जां बरोबरी
करना मता जरूरी ऐ। उत्थे गै अफगानिस्तान बी सेमीफाइनल च अपनी थाह बनाई सकदा
ऐ बशर्ते इंग्लैंड, दक्खन अफ्रीका गी 207 जां एह्दे शा मती द्रौड़ें दे फर्क कन्नै हराई देऐ।

<><><><><><>

Delhi-Rain

देश दी राजधानी दिल्ली च अज्ज बड्डुलै हौली बरखा पेई ते गासै पर गरज चमक कन्नै बदल
घनोए देन।

भारती मौसम विभाग नै दस्सेआ ऐ जे राजधानी दिल्ली सने बक्ख-बक्ख उत्तरी प्रदेशें च
पश्चिमी हवाएं करी बरखा आह्ला मौसम बने दा ऐ। राजधानी च तापमान च लगातार
बदलाव दर्ज कीता जा'रदा ऐ।

<><><><><><>